



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Ukraine-i Mariupol port nung tesem balala amak

Pandya Afghanistan den ODI masayatetsü



Abhijeet Dipke

VOL. XXIII ISSUE NO. 238 (ADOK 238) DIMAPUR YANGTEPNÜ (THURSDAY) AMMI (JUNE) 11, 2026

₹ 5.00

Shillong nung NE infrastructure summit alitsü

Shillong, June 10, 2026 (TYO): Taruba hopta Shillong North East India Infrastructure Summit & Exhibition (NEIINFRA Summit) 2026 amungtsü.

Iba ya Northeast India nung infrastructure dak sendakba sentong tulutiba asütsü aser June 15 aser 16 anogotem Lariti Performing Centre, Mawkasiang nung alitsü.

Meghalaya sorkari host state aser Build India-i co-organiser ama iba summit ayongzüker. Iba sentong ya Union Minister for Road Transport and Highways Nitin Gadkari-i lapoktsütsü.

Northeastern state 8-Arunachal Pradesh, Assam, Manipur, Meghalaya, Mizoram, Nagaland, Sikkim aser Tripura nungi teshimtet nübotem iba summit nung adentsü imlar. Parnok dak alia Union ministries balala nungi ketdangsurtem, industry leaders, investors, infrastructure developers aser public sector undertakings adentsü.

Anogo ananü sentong nung teshimtet nübok 800 tema adentsü imlar. Parnok rongnung sorkar tongti ketdangsur 300 shi

dena lir aser infrastructure development o investment indang jembitsü ta tayongertemi ashi.

"Iba summit ya policy dialogue, investment promotion, business networking aser knowledge exchange indang sabang ka ama asütsü" ta organising committee chair Sanjay Goyal-i ashi.

Infrastructure indang tarutsü ya tongti tongshi asem- "People, Prosperity and Planning" nung amendaka lir. Meghalaya-i Northeast tashitaitba aser tesentaktep tajungba akümtsü asoshi sector leaders pelashishai agizüksü renema lir ta Goyal-isa ashi.

Meghalaya Chief Minister Conrad K Sangma-i iba sentong nung tetushi süa jaoker ka ama shilem agitsü aser pai Union ministers, Northeastern states chief ministers, policymakers, industry experts aser business leaders adentsü jaokogo.

Iba summit nung IIM Shillong, HVS Anarock aser Invest India ajanga shisatsü agütsütsü aser parnoki sector-specific research aser knowledge papers lemsateptsü imlar.

Narendra Modi-i mapang talangtiba prime minister inyakba otsü yangluogo

New Delhi, June 10, 2026 (Agencies): Narendra Modi-i mapang talangtiba prime minister inyaka aruba atema Union Cabinet-i Bodbarnü bangzüng ka renemogo aser iba ya Indian democracy nung otsüsütsü tatalokba ka lir.

Cabinet züngsemtemi tanü PM Modi nem iba alizüng tongtetba atema noktaker teka malokja tenüngsang agütsü.

Jawaharlal Nehru-i anogo 4,398 tashi prime minister khen danga methitemi inyakba otsü ajatetba atema tanü Cabinet-isa PM Modi nem tenüngsang agütsü.

Cabinet-i PM Modi indang "Viksit Bharat" mangdang pusema nungitsü aser national

security, inclusive growth o social justice lenisüba atema tetushi agütsür ta parnokisa bangjemtepogo.

2047 tashi nung India renloktsü atema PM Modi lenisüba pusema nungitsü aser pai public service atema anibelem arema bendanga agüja tenzüka asoshi tenüngsang agütsür ta Cabinet-i b bangjemtepogo.

PM Modi-i ajak renloktsü aser lokti temeten asoshi inyakba tenüngsang agütsür aser national security akangshiba den India taginübatem kümzüka ayuba atema tushir ta Cabinet-isa metetdaksü.

Modi-isa sensakertem asoshi welfare programmes tenzüka inyaker aser pai Prime minister

inyakba kümsük nung nisung crore 25 tema sensaktia nungi anitetogo ta Cabinet-isa ashi.

BJP-i aniba National Democratic Alliance (NDA) sorkar küm 12 abensaba anogo nung iba bangzüng renemogo.

NDA sorkar kümsük tasembuba nung küm ana ajungtsü lia PM Modi-i "longest-serving prime minister" naroküm ngutetogo.

May 26, 2014 nü PM Modi-i India nung prime minister inyaksü tenzüka liasü. 2019 nung pa tanaben takok angu aser May 30, 2019 nungi maneni Prime Minister inyaksü tenzüka. Iba sülen June 9, 2024 nungi pai kümsük tasembububa prime minister inyaker.

Ao Senden-i aitsür; Tanutsüla atema temeten meshir

Dimapur, June 10, 2026 (TYO): Unger nunger asür T. Opang Jamir'er jabaso O Watimeren Jamir, Sungratsu nunger asür Spongmeren'er jabaso Tsuktimongba aser Unger nunger asür Imsunukshi'er jabaso Akangkokba Ao nungeri Dimapur nung tanur tetsür ka dak tashiyim inyak ta asüba

khukhua aitsür ta Ao Senden-i metetdaksüogo.

Tanü putu nung külem meimchir ka dak aser talisa tanur tetsür ka dak shiruru yimya benshidak mali. Ozüng amertemi tai tonglokja alirtem jenjang mesüra mapa mereprangi tatishitsü keta temerenshi agütsütsüla ta Ao Senden-isa

metetdaksü.

Onoki tanutsüla den külemi noktaker aser iba tatalokba ya la taküm nung teti atema tarak ka masütsü saka taküm tajungba libaliroa aotsü sarasademtsür ta Tir Marsanen Imsong aser Tongti Tesemdanger Imtipokyim nati sangdong nung ashi.

Naga nunger mang 6 anguba sülen UNC-i ghonda 24 mokdangtsü ayonger

Imphal, June 10, 2026 (Agencies): Manipur nung June 11, 2026 anepdang 6:00 ako nungi Naga nunger aliba tesem ajungalen ghonda 24 mokdangtsü ta United Naga Council (UNC)-i metetdaksüogo.

May 13, 2026 nü pur aoba Naga civilians trok indang tasü mang anguba sülen UNC-i iba sangdong agütsüogo.

June 9, 2026 nü Kuki nunger 14 chiokba sülen Naga nunger teimla tulu liasü. Ajisüka nisung trok pur aoba indang tasü mang anguba osang angashia teimla ajunga samaogo ta UNC-i Bodbarnü metetdaksü.

Iba tatalokba khukhua aitsür aser iba ya human rights alema inyakba dang masü saka meimchir taküm mapayui inyakba ka lir. Tasür kibongtem den asükhu lemsateper aser parnok mangyimba mapang külemi noktaker ta UNC-isa ashi.

Iba tatalokba ajanga Naga nunger kanga shisabulur aser civilian tem lendong nungi jenbua maliba asoshi süoki ia bilemer. Parnok tepsetba ajanga sorkari tai maketba sensotem kümzüka meyetetba sayuogo aser iba ya Naga nunger ajak asoshi lendong tulu ka ama züngshir ta UNC-isa metetdaksü.



Onoki temeten meshia Naga nunger alidak ajak nung timi mokdangtsü ayongzüker. Sensotemi timi shilem agitsü aser tasürtem o parnok kibongtem asoshi temeten bushiba maparen nung yariteptsü ayongzüker ta UNC-isa ashi.

Manipur aser India sorkartemi onoki akhangba onüktem magizük tashi tasü mang trok magizüksü ta parnokisa shisem.

UNC-i Kuki telungpur telok ajak den Suspension of Operations (SoO) agientsü

takhangba agütsür.

Parnokisa May 13, 2026 nü Leilon Vaiphei yimtsüng nungi Naga civilian 18 pur ao ta tai tonglokja aliba Kuki National Front-President (KNF-P) züngsem ajak anema ken o benoka angadangtsü takhangba agütsür.

Naga civilian 6 tepsetba aser Joujangtek nung Wilson Thanga Chiru tepsetba atema KNF-P dak tai tongloktsür.

UNC-isa Leilon Vaiphei Village Chief Lalboi Vaiphei den civilian 18 apuba nung shilem agirtem aputsü aser parnok

anema ken o benoka angadangtsü takhangba agütsür.

KNF-P ya terrorist organization ka sangdongtsüla aser Manipur Deputy Chief Minister Nemcha Kipgen mapa nungi agientsüla, kechiyong la kinungbo Seminthang (Thangboi Kipgen) ya KNF-P nung President inyaker ta UNC-isa takhangba agütsür.

Iba ama mapa ka ajanga nübortemi state sorkar dak tamang akatsü ta UNC-isa ashi.

May 13, 2026 nü Naga nunger trok pur aoba indang

tasü mang Kangpokpi district nung nguogo.

Manipur Police, Central Reserve Police Force (CRPF) aser Assam Rifles ajanga ghonda 24 shi search operations asüding mangtem nguteta liasü. Iba mapang parnoki sniffer dogs aser forensic teams mapa lemsüka liasü.

May 13 nü Leilon Vaiphei nungi pur aoertem indang mang asütsü ama bilemer ta Manipur Police-i metetdaksü.

Parnok ya Pastor Kenpibou, Phenrongwi Thiumai, Rev. Manu Thiumai, Dilip Thiumai, Kaliwangbou Abonmai aser Ch. Phenrilung nunger ta jangjaogo.

Civil society organisations (CSOs) ajanga olemtepa aruba den arogo teloktem aser Manipur sorkari mepishiba sülen Senapati district nung Kuki nunger 14 chiokba sülen anogo ka lir Naga nunger trok mang nguogo.

May 13 nü Konsakhul Naga village nung reception programme ka nung dener meyipa aodang Leilon Vaiphei village nung parnok sot. Iba mapang tetsürtem aser tanur ka dena nisung ajak agi parnok 18 pua ayu aser mapang tatsüka lir tetsürtem den tanurji chiok saka tebur 6 yabo mechik.

Chümoukedima DPDB senden nung Census aser mürekmeju indang jembia



Advisor, Urban Development & Municipal Affairs aser Chairman, DPDB, Chümoukedima, Zhaleo Rio lenisüba kübok June 10, 2026 nü Deputy Commissioner, Chümoukedima indang Conference Hall nung Chümoukedima DPDB senden amendang tangokba noksa nung angur.

Dimapur, Aami/June 10 (TYO): Ita shia amenba District Planning & Development Board, Chümoukedima senden June 10, 2026 nü Advisor, Urban Development & Municipal Affairs aser Chairman, DPDB, Chümoukedima, Zhaleo Rio lenisüba kübok Deputy Commissioner, Chümoukedima indang Conference Hall nung mena liasü.

Iba senden tenzüka taoba DPDB senden nung lemteta alibatem lepa repringshi aser Yimkhiung Baptist Borü Society, Naga United Village registration temelaba agüja liasü.

K.S. Yimchunger Society, Vidima atema board-i maneni inyaka alitsü aser küm asem sülen pei tribal body nungi No Objection Certificate bener arutsü ashi.

Iba sülen parnoki mürekmeju, solid waste management, libajen wazüka ayuba, traffic ketdangsüba aser Census renemshiba indang onüktem

jembia liasü.

Advisor Zhaleo Rio-i züngsem tasentem pela agizükba o jembia aser department ajunga dang nübur ajangzüksü mechi sorkar indang schemes aser policies shidak inyaksü ayongzüka liasü.

Pai Chümoukedima Town Council dang mapang shia jana müreka aoba mapa inyaksü totuyuba agütsü aser jana bensaba aser tim yimya nung jana indokba indang awareness agütsütsü ajungshia liasü.

Advisor Rio-i departments aser institutions balala dang nüburtemi amshiba tesem nung dustbins yutsütsü, saisapongba tesem aser nüburtemi amshiba tesem amala nung süngdong atemtsü ajungmeso.

Traffic ketdangsüba onük nung jembidang National Highway nung police department-i speed limits amshiba asoshi pelaba lemsatap aser iba yagi gari keraa aniba mesüra arsanga aniba ajanga

lendong ajuruba ajemtsü, ta Advisor-i ashi.

Nisung shinga ozüing dang temaba mali, anungji ozüing shidak amshitsüla aser aibelener nem tapet temerenshi agütsütsüla, ta pai shia liasü.

Deputy Commissioner, Chümoukedima, Polan John, NCS ajanga electoral rolls indang Special Intensive Revision (SIR) tang agia aliba aser Census exercise indang osang tongmelang agi lemsatapa liasü.

Pai Enumerators aser Supervisors tem dang pei mapa shidak inyaka Census nung aibelen masütsü ajungshia liasü.

Deputy Commissioner-i Solid Waste Management Rules yanglushiba yagi urban aser rural areas ajunga awajemer aser jana shilem pezü kuma lemsatsü ashir, ta metetdaksü. Jana jenti adokba tesemtem jangjatetogo aser ozüing shidak amshitsü asoshi sendaktepa aliba departments tem den sensen menogo, ta ashi.

Iba senden nung DPO, DISHA, Orenthung Ngullie-i AIDS Suraksha indang PowerPoint presentation agütsü aser district nung iba sentong mapa kuma inyakba indang lemsatapa liasü.

Field Trainers Alongba Ao aser Arenla nati Census aser self-enumeration inyakyim indang tejangja rateta ashi.

Taruba DPDB senden nung Nagaland Pollution Control Board (NPCB) ajanga Solid Waste Management indang PowerPoint presentation agütsütsü lemteta senden tembang.

Census training nung DC Kohima-i Enumerators ajungshia



Dimapur, Aami/June 10 (TYO): Bodhbarnü Deputy Commissioner Kohima, B. Henok Buchem, NCS-i DC Office Complex, Kohima nung tesem asem nung Census of India 2027 training agia aliba semdanga Enumerators aser Supervisors tem den sensakm sema liasü.

Training agirtem den jembidang, Census nung shilem agiba ya otsüsütsü mapa aser maongka lir, aser ketdangsür aikati iba exercise nung shilem aginüba lemsatapogo, ta pai ashi.

Linük atema tongtipang data

bendenba nung Enumerators tem ya frontline workforce amai alitsü ta pai ashi.

DC-i training agirtem dang iba Census operation tepiyong yariteptsü ta ashi aser officers tem pei nem nungloksüba tesem nung kija inyaksü akok, saka parnok den supervisors, charge officers, administrative ketdangsür, aser Directorate of Census Operations nungi yariteptsü, ta ashi.

Pai Enumerators tem dang timtem ajuruba mapang kati ka den yariteptsü ayongzüka liasü.

Nenoki data bendenba ya amshia state aser national levels

nung sentong yangluba aser terenlok maparen asalentong nung amshitsü, anungji Enumerators temi züngzünga iba mapa inyaksüla, ta ashi.

Taruba küm agütsü aliba House Listing Operation aser Population Enumeration ya linük puti otsü nung shilem ka akumtsü, anungji nisung ajaki bendanga agütsür tejak tenteta inyaksüla, ta Buchem-i ashi.

Paisa parnok dang census takok angutsü nenok dak keta lir aser district indang takok ya team nung züngsem shiai inyakba asadanga nung metettsü ta nenshia ashi.

Dimapur nung Supervisors & Enumerators training tanü tenzüksü

Dimapur, Aami/June 10 (TYO): Census 2027 indang Phase-I kübok Supervisors aser Enumerators atema training ya phase lemsar Livingstone Foundation College of Nursing, Dimapur nung agütsü ta Office of the Deputy Commissioner and Principal Census Officer, Dimapur ajanga sangdong ka nung metetdaksü.

Deputy Commissioner and Principal Census Officer, Dimapur, Dr. Tinojongshi Chang, NCS-i sangdong nung ashiba agi, iba training nungya Dimapur Sadar, Dimapur Municipal aser East Dimapur nungi personnel tem ayimjemsü. Phase-I training nung batches pezü alitsü, koba

June 11 nungi 13 tashi alitsü, Phase-II training nunga batches pezü alitsü, koba June 15 nungi 17, 2026 tashi alitsü.

Training ya anogoshi anepdang 9:30 ako nungi nikongdang 6:00 ako tashi alitsü aser Phase-III training atema sentong tejangja osang mapang tetemtsü nung metetdaksütsü.

Supervisors aser Enumerators ajunga pei nem lemzüksüba anogo nung training agiba tesemi arutsü metetdaksüogo. Attendance ya kechi südir süaka agütsü aser Heads of Departments temi Census duties asoshi shima aliba ketdangsürtemi shilem agütsü asoshi mapa nungi anisüngzüik agütsütsü metetdaksüogo.

State nung moko nokdangba nungittsü Minister Paiwang-i ayongzüker



Dimapur, Aami/June 10 (TYO): State tesem ajunga nung küm ka moko nokdangtsü aliba nung nübur ajungai nungita yariteptsü Minister, Health & Family Welfare, P. Paiwang Konyak-i ayongzüka liasü.

Nüburtem temang nung timtem agütsüba tebilemstü azüoktsü mechi aser Food Safety and Standards Authority of India (FSSAI) nungi totuyuba agütsüba ama state sorkari state tesem ajunga nung moko mesüra nicotine aliba chiyongtsü yangluba, ayuba, belenba, alemba aser ayokba nokdanga lir.

Mongulbarnü Department of Health & Family Welfare indang high-level review meeting ka amendang Minister Paiwang-i iba o ya jembia liasü, kong Secretary H&FW, S. Tainiu Khiam aser department nungi ketdangsürtem dena liasü.

Senden aliba mapang, public health asoshi arok-i teka amteper nungittsü nungdakba indang pai ashi aser civil society organizations, arogo aser nübur lenirtem dang iba küm ka moko nokdangtsüba sentong nung temulung ajak agi yariteptsü ayongzüka liasü.

Iba ama mera ajanga dang nüburtem temang tajungba akumtsü aser lanurtem moko achiba ajanga timtem agütsüba nungi kumzüka ayutsü, ta pai ashi.

Minister-i stakeholders ajunga dang iba ozüing shidak

aser mapa kuma inyakba nung district administration aser police den amalitep akatsü ayongzüka liasü.

Ebola wara asoshi renema aliba, NQAS kübok 100-day mission repringshiba, TB Mukht Bharat Abhiyan campaign indang inyakyim aser tang teinyakdak sentongtem repringshiba mapang Paiwang-i Department dang district level nung outreach tashi itshitsü, service delivery tajungba akumtsü aser sorkar indang healthcare mapa tem yimdak yimtsüngtem nung aliba nüburtem nem densema agütsütsü ayongzüka liasü.

Sentong nung State Nodal Officer IDSP, Dr. Nyan Kikon-i jembidang, Nagaland nung tang tashi Ebola tashidak puteta mali, saka Department-i saksalema repringshiba atatsü aser renema alitsü totuyuba agütsüogo ta ashi.

Iba senden nung Mon Medical College, NIMSR Kohima, PM-DevINE kübok projects tem, NHP III kübok externally aided projects (EAP), district hospitals balala nung trauma centres amenoktsüba, state mental health institute tajungba aser tuluba kumdaksütsü, state cancer institute amenoktsü, state allied health institute, upgradation of NIMSR aser Naga Ki nung AIIMS tasen amenoktsü onüktem jembia liasü.

₹6000
is now credited directly
to my account



₹4.3 lakh crore disbursed under PM-KISAN,
₹26+ lakh crore worth of procurement at MSP,
₹2 lakh crore crop insurance,
8 crore Kisan Credit Cards - together these initiatives
are strengthening the nation's Annadata

12 Vishwas ke, Vikas ke, Jan-kalyan ke





Indore, June 10, 2026: 16buba BRICS Agriculture Ministers' Conference nung adenertemi Indore nung Rajwada Palace semdangba mapang tangokba noksa nung angur.

Tanü Cockroach Janta Party-i linük tesem ajaklen longkak aittsü

New Delhi, June 10 (Agencies): Bodhbarnü Cockroach Janta Party (CJP)-i, parnoki June 11 nü Pune nungi tenzüka linük tesem ajaklen longkak aittsü aser Union Education Minister, Dharmendra Pradhan-i menden nungi manenra June 20 nungi Jantar Matar, New Delhi nung mener longkak aittsü, ta metetdaksü.

CJP-i sangdong ka ajanga, Pune, Lucknow, Amritsar, Bengaluru, Jaipur aser Hyderabad densema yimti aika nung longkak aittsü, ta metetdaksü.

Ano külen CJP tentetsang, Abhijeet Dipke-i X ajanga, Brihostibarnü Pune nung longkak aitba nung climate activist Sonam Wangchuk-ia shilem agitsü, ta metetdaksü.

Tatidang balala nung ochimashi aser inyakyim meshidakba atema Union

Minister-i kuli agia menden nungi anentsüla, ta shia CJP-i, Union Minister Pradhan-i menden nungi manen tashi parnoki longkak aittsü, ta metetdaksü.

NEET-UD densema tatidang balala junga ketdangsa magitetba ajanga kaketshirtem aser parnok kibongtem million aika kongshiogo, anungji iba ya linük atema tongti tebilemsü onük ka lir, ta CJP-isa metetdaksü.

"Item ama tamakok maneni anguba atema Education Minister, Dharmendra Pradhan-i kuli magir. Temaba menden nungi kuli agitsüla. Ibayongji onoki leshia kasa takhangba agütsür: Dharmendra Pradhan-i menden nungi anentsüla," ta CJP-i metetdaksü.

"Sorkari iba takhangba magizükra iba linük nung lanurtem June 20 nü New Delhi nung aliba Jantar Mantar nung

adenshitsu aser minister-i menden nungi manen tashi mener longkak aittsü," ta parnokisa metetdaksü.

Iba ya India nunger shisaliok inyakyim akhümket atema lir, ta shia CJP-i kaketshirtem, tsüraburtem, tesayurtem aser sensotem dang linüki ochi temeden atema raraba nung shilem agiang, ta ayongzük.

Anogo ishika tejaklen CJP-i Jantar Mantar nung longkak aita liasü aser iba sentong nungji kaketshirtem aser tsüraburtem aika adenshia shilem agi.

CJP-i, June 6 nü longkak aitba tu tetenzük dang, kechiyong minister Pradhan menden nungi manentsüra mesüra pasasa menden nungi manenra CJP-i yimitem nung longkak aittsü, iba sülen Jantar Mantar nung anogo telatet makai longkak aittsü, ta metetdaksü.

India nung PM talangtiba inyaksangji Modi kümogo

New Delhi, June 10 (Agencies): India nung Ato kilonser inyaka arurtem rongnung mapang talangtiba inyaksangji Narendra Modi kümogo, aser iba atemaji alima nung lenirtem aser India nung Minister temi Ato kilonser Modi nem tenüngsang agütsü.

Ato kilonser office nung pa anogo 4,399 jungogo aser ibaji ajanga India nung mezüng Ato kilonser inyaksang, Jawaharlal Nehru ajatetogo.

2014 küm May 26 nü Modi-i Ato kilonser tenangzükba agia liasü.

Sri Lanka Tir, Anura Kumara Dissanayake-i, iba alizüng tongtetba ya pai junga yimsüsüba aser nüburtem taküm nung temelenshi bener arutsüba ajanga lir, ta metetdaksü.

Papua New Guinea Ato

kilonser, James Marape-i, Modi ya lenirtem atema tatishitsu tajung ka lir; linük ana tsünga maneni tesendaktep tashi itshiner, ta metetdaksü.

Australia nung taoba mapang Ato kilonser, Scott Morrison-i, "Ana senteper Comprehensive Strategic Partnership yangluba atema nüma atanger," ta metetdaksü.

Malaysia Ato kilonser, Anwar Ibrahim-i, linük ana tsünga tesendaktep ano tajungba akümsü atema maneni amalitepa inyaker, ta metetdaksü.

Nigeria Tir Bola Ahmed Tinubu-i X ajanga, "Nigeria atema tembar tajung, Ato kilonser Modi ya kü tembar aser ni melung lemetba. Tesüiba küm aika ni pa dak aliba shisatsü, tasütait aser par linük terenlok aser azükuru atema pai inyakra nukshia arur,"

ta metetdaksü.

Taoba mapang Maldives nung Tir Ibrahim Mohamed-i X ajanga, Modi lenisüba ajanga Maldives-India tsünga tesendaktep tajungba kümogo, ta metetdaksü.

Yamaji Kenya Tir William Samoei Ruto, India Tir Droupadi Murmu, tatong Tir C P Radhakrishnan aser taoba mapang Tir Ram Nath Kovind nungeri Modi nem tenüngsang agütsü.

External affairs minister S Jaishankar, Defence Minister Rajnath Singh, Finance Minister Nirmala Sitharaman, Commerce & Industry Minister Piyush Goyal nunger densema Union Minister aser party balala nungi lenirtem aikati pa nem tenüngsang agütsü.

Indus ayong nungi tzü-jang kata Pakistan nung meyimokdaksütsü

New Delhi, June 10 (Agencies): Union Jal Shakti Minister, CR Patil-i, sorkari Indus ayong tzü ajak asen litsüi mesür arutsü atema inyaksü, aser ibaji ajanga Pakistan tsütsülen iba ayong tzü akongtsü, ta metetdaksü.

Patil-i, Indus Water Treaty (IWT) tezüngzüktep anendaka lir aser India sorkari asen sensotem tajangzük ngudaksütsü atema Indus ayong tzü amshitsu asoshi project tasak kar inyaker, ta metetdaksü.

"Indus Water tezüngzüktep anendaka lir. Ato kilonser Modi-i iba telemtetba agiba mapang nungi tenzüka iba ayong nungi tzü-jang kata Pakistan nung meyimoktsü atema meranga inyaker. Ato kilonser tetuyuba nung Home Minister Amit Shah-i iba ya ketdangsa repranger aser iba atemaji onoki yakyaka inyaker. Mapang lemsar iba mapa ya inyaker aser taruba küm 1.5 nungi küm 2 tashi

nungbo Indus ayong tzü Pakistan nung yimokba ya anenadoktsü. Taruba kümtem nung iba ayong nungi tzü-jang kata Pakistan nung meyimoktsü," ta Minister Patil-i metetdaksü.

1960 küm September 19 nü India aser Pakistan na tsünga Indus Water Treaty (IWT) tezüngzüktep ya agia liasü. Iba tezüngzüktep kübok Indus nung aliba ayongtem linük ana tsünga lemsatapa agir. Ajüsüaka yaküm kiralongrartemi Pahalgam amakba sülen India-i International ozüng kübok tashi amshia IWT tezüngzüktep ya anen.

Pakistan-i ibaji ashishia Court of Arbitration nung ken o benok saka CoA-i agütsüba oshidang balala India-i magizükter.

Yaküm April 22 kü kiralongrartemi amakdang raliwalir 26 tepset aser aika yiruja liasü aser iba ya Pakistan ajanga lir ta tai tonglokja India-i IWT tezüngzüktep anena liasü.



Amritsar, June 10, 2026: Bodhbarnü Guru Arjan Dev asüba anogomong nung Sikh nunger temeshi ainlen jajartem Amritsar nungi Pakistan-i apusoa aodang tangokba noksa nung angur.

SANGDONG AGÜTSÜR

Government of India
Department of Agricultural Research & Education

Agricultural Scientists Recruitment Board (ASRB), Department of Agricultural Research & Education (DARE) nung Chairperson mapa atema applications/nominations meshir

Agricultural Scientists Recruitment Board (ASRB), Department of Agricultural Research & Education (DARE), Government of India nung Chairperson mapa atema application meshir

2. Agricultural Scientists Recruitment Board (ASRB) ya independent recruiting agency ka lir aser DARE den sendaktepa lir. Agricultural Research Service, Research Management Positions aser item ama posts aser services nung shimoktsü atema parnoki inyaker aser ibaji Indian Council of Agricultural Research (ICAR) President-i shia aliba ama lir. Iba Board-isa Career Advancement Scheme kübok ICAR Scientist tem promotion atema inyaker. Chairperson jagi Board inyakyim junga ketdangtsü atema leadership & administrative dak sendakba shisa agüja inyaker.

3. Temsüa aliba telatetbatem aser tanga osang tejangjaji www.dare.nic.in, www.icar.org.in aser www.asrb.org.in nung angutsü.

4. Applications/nominations agizüktsü atema tatembangbuba anogo aser mapangji 08.07.2026 anogo nikongdang 05:00 tashi.

CBC : 01301/11/0002/2687

Tanü PM leniba nung NITI Aayog Council senden amentsü

New Delhi, Aami/June 10 (Agencies): Brihostibarnü Rashtrapati Bhavan Cultural Centre, New Delhi nung Ato kilonser Narendra Modi leniba nung 11buba NITI Aayog Governing Council senden amentsü, ta ketdangsertemi metetdaksü.

Iba senden nung talisa "Viksit Bharat @2047" atema jembitsü.

Iba senden nung state balala nung Chief Minister tem, Lieutenant Governor tem aser tongti ketdangsertemi 2047 küm tashi nungbo "Team India" mangdang ataloka India ya terenlok linük ka akümsü atema jembitsü.

Iba senden nungji entrepreneurship ajungkettsütsü, skilling initiatives aser linük

tesem ajaklen mapa maangka adokdaksütsü atema jembitsü.

Governing Council senden nungsa lenla ajak nung terenlok atema asalentong yanglutsü. Governing Council senden nungjisa yaküm December ita nung Chief Secretary tem National Conference amenba sülen Chief Secretary temi benokba onüktem nung o lemetpsü.

Chief Secretary temi benokba tongti onük ponguji- tanur asüdang shisaliok agütsüba, school shisaliok tsütsü temelenshi, tarutsü atema renema skills agütsüba, temaba shisaliok & shisaliok rongsenkettzüng aser saisapong terenlok onüktem lir.

केनरा बैंक Canara Bank		KIOJEN AYOKTSÜ SANGDONG		SPECIALIZED ASSET RECOVERY MANAGEMENT BRANCH 2nd Floor, Dee Bee Grande, 6 Mile, Panjabari Road, Guwahati-781022, E-mail- cb7259@canarabank.com	
Securitisation and Reconstruction of Financial Assets and Enforcement of Security Interest Act, 2002 aser Rules 8(6) of the Security Interest (Enforcement) Rules, 2002 kübok kiojen E-auction asütsü sangdong.					
Public dang, talisa tsünglanglen shia aliba sen apur (tem) aser Guarantor (tem) dang ya sangdonger, Secured Creditor dang mortgaged süa aliba tsünglanglen shia aliba kiojen ya Canara Bank nung Authorised Officer-i agiadokogo aser ibaji Canara Bank Branch-i sen apur & Guarantor dang nungi sentsüh alangzüktsü atema 29.06.2026 anogo nung kiojenji "Kong aliar yamaji" aser "Yangji aliba ajak" basis nung ayoktsü.					
Earnest Money Deposit (EMD) ji 29.06.2026 anogo nikongdang 11:00 ako tashi nung mesüra iba anogo matongdang asütsü. Auction ji website: https://banknet.com/ ajanga "Online E-auctioning" asütsü.					
Auction anogo aser mapang: 29.06.2026 anogo nung anüngdang 11:00 ako nungi nikongdang 12:00 ako tashi (Ayokba maparen melembang tashi minute pongungu (5) atsilangtsü). Branch, sen apur/guarantor, liability, kiojen osang aser EMD, reserve price osang tejangja:					
(A) Secured Creditor/Branch Tening aser Address (B) Sen apur Borrower / Partner / Guarantor tening	Brief Description of Immovable Property	(A) Total Liabilities (Rs.): (B) Reserve Price (Rs.): (C) EMD (Rs.): (D) Increment Amount (Rs.):			
(A) Canara Bank, Specialised ARM Branch, Guwahati 2nd Floor, Dee Bee Grande, Panjabari Road, Six Mile, Guwahati- 781022 (B) Borrower / Partner / Guarantor: Shiniho Kakheto Jakhalu S/o Shinino, Marble and Granite House, Purana Bazaar, Kohima Road, Dimapur, Nagaland, PIN- 797112	Revenue Circle- Dimapur, Dist.- Dimapur, Nagaland kübok Thilixu, 3rd Mile, Block- IV, Bye Lane 5 nung Mr. Shiniho Kakheto Jakhalu tening nung aliba ali tasazük 1 Bigha 02 Katha 10 Lechas (200ft * 180ft = 36000.00 Sqft)	(A) 90.58 Lakh (B) 92.96 Lakh (C) 9.30 Lakh (D) 0.50 Lakh			
As per land allotment order Sl. No. 90 dated 25.05.2012 Bounded as under:- North: Approach Road, South: Fishery, East: Paddy Field, West: Hohiheli.					
Iba sale telatetbatem aser osang tejangjaji Canara Bank indang website (www.canarabank.com) nung link "E-Auction" nung angutsü mesüra mapa inyakra anogotem nung office mapang yangi tongtepratepang- Branch Head of Specialized ARM Branch, Guwahati, 2nd Floor, Dee Bee Grande, Panjabari Road, Six Mile, Guwahati, PIN- 781022, Contact No. +91-7411004517.					
Date: 09.06.2026, Place: Guwahati				Authorised Officer, CANARA BANK	



TIR YIMYIM

YIMOBILEM (EDITRIAL)

DIMAPUR THURSDAY, JUNE (AMMI) 11, 2026

Taochi tulu sayuogo

Manipur nung Naga nungger telok kari pua aliba Kuki nungger nisung 14 kecha tarak maket ser taküm tajung chiokbaji alima tsüngdang Naga nungger ajak tejak tentetsüsa taochi mapa tuluka inyaka sayuogo. Atangji, Nagaland nung alir Naga nungger aikati Nagaland state ajanga orr aliba Naga kintem indang junga memeteti alitsüa akok, ajisüaka Naga nungger nütsünga aser alinüka Nagaland state nung aliba dang nungi teimba aser tuluba asütsüsa Nagaland state artsü alema orr Myanmar nung, Arunachal nung, Assam nung aser Manipur nung lir. Item Naga nungger rongnung tia majung kaji mapang mapang shia Manipur state nung aliba Naga nungger o Kuki nungger na tsüngda mangatettep adoka nisung taküm aika samatsüsa azü tokshi lendong ataloker. Aji oda, Manipur nung Meitei nungger o Kuki nungger na tsüngda raraba anendaktsütsü melen ano moraloka oa Naga nungger o Kuki nungger na tsüngda rara tenzükbaji parnok asoshi dang masü saka asenok asoshia tebilemtsü tuluka kümogo. Atangji, Manipur nung Kuki nungger den raraba ya Naga kin ajak masü kar dang asütsüa akok, kechiyong Kuki nunggerbo kin ka dang saka Naga nunggerbo kin aika, ajisüaka Naga ta asüba agi Naga kin ajak adentsüsa akümer. Iba jagi Manipur nung tenteta aliba Naga nungger telungjem United Naga Council (UNC) lenisüba nung Manipur nung aliba Naga nungger lungjemer tang ama timtem lendong mapang külemi nokdaker. Aji oda, yakanü Naga nungger pua aliba Kuki nungger terpezüjia UNC lenirtemiang anir oa chiok. Atangji, par Kuki nungger terpezüjibo tai maketba senso tajungtem liasü saka Kuki nungger Naga nungger par trok pua bener aoba agi parnok den melenteptsü asoshi pua ayuba liasü. Ajisüaka, tejashitsüka Naga nungger Kuki nungger par terpezüjibo taküm tajung chiok saka Kuki nungger apuba Naga nungger trokjibo tepseta endoker liasü. Ashiko, Kuki nungger Naga nungger par trok pua tepsetbaji Naga nungger Kuki nungger tepsetba mang ayanger amai bilema inyaker südi, ajisüaka rara nung süaka tai maketba nisung pua bener oa tepsetba mapaji tasümaishisa maka mapa ka asütsü. Tashiyim agi inyakba mapa agi tashiyim dang ajangzüksü aser azütokshiba mapa agi azüang tali tokshitsü. Ibayongji, akhi putu nung ama, tanü putu nunga tenük melen tenük agira, iba jagibo ajak nükpoker dang kumadoktsü ta angatetba agi taitokteper aser temeim agi tesempa akoktsü meranger. Tanü Manipur nung Meitei nungger o Kuki nungger na aser Kuki nungger o Naga nungger azütokshia raraba tongpangji shingaia makoktsü, kechiyong Meitei nungger Manipur nung Kuki nungger kata mali mesamadaktsütsü aser Kuki nungger Naga nungger kata mali mesamadaktsütsü, kasaji Naga nungger Kuki nungger kata malitsüsa samatsüsbaji makoktsü. Anungji, Manipur nung kin asempronglai tangtetba kati arua yimjung mapang ka tenzüksü nungdaker. Iba yimjung mapangji Naga nungger Kuki nungger 14 pua anogo 27 yur taküm tajung chiokba taochi aser temeim mapa nung jagi tenzüksüla. Ano, talisa Manipur nung aliba Naga aser Kuki nungger na prongla ya Khristan purtem lir aser Meitei nunggerbo teimbaka limapurtem lir, anungji limapurtem dang Yisu temeim indang osang tajung kuli asütsü melen Khristan telok ana tsüngda azütokshia raratep manenba ajanga asenok Khristan taküm nung tamakok tuluka ajurur asütsü. Atangji, Naga nungger Kuki nungger 14 tashi taküm tajung chiok saka Kuki nungger Naga nungger trok pua tepset ta asüba osang jagi Naga nungger aika jashia alitsü aser karibo Naga nungger asoshi tamakok amai bilema alitsüa akok, saka Naga nungger o Kuki nungger na raraba tongpang nung Naga nungger Kuki nungger 14 anogo 27 pua yur tarak maket taküm tajung chiokba jagi Naga nunggeri tongpang kokogo ta bilemdi. Atangji, Kuki nungger tepsetba Naga nungger par trok kinungger den külemi asenoka mang aymsüba dak alaka parnok dang tashitsü maka kümogo. Ajisüaka, Manipur lima yimjung asoshi par trok takümji tenla asütsü. Aji oda, Manipur yimjung asoshi UNC-i inyakba taochi mapa jagi Manipur lima sünepa akümstsü imlar.

OLEMSABANG

AOR TAR YIMSÜYIMBONG

~ Wt. Repabenla, Asst. Professor, FAC

(Yashi adok nungi...)

3. Anembong

Tar nisungtemi kodangsa külemküja asütsüsa mapang arudir parnok kanga dang anembonga atarang itemji külema aru. Shiri anembong mesütetlir parnokjibo arishi malanger ta angatet nung kanga dang metsünga reta anembong. Asen Aori tekülemba medeni mapa kecha inyaka maru, oda yimra mopung ka sema tokolak tera menü nung iba asoshia tekülemi aotsüsa aküm. Aser kodang tekülemi odir yangji anembong sentaktepa lir. Tatishitsü ka; kodang nisung ka arem nungi tera shiranga atokdir pa/la ji süng, lung mesüra meta kar nung tasem mena (tanela apuba) alitsü asü ta tamang mekateti parnok araki-i aotsü. Itangji pa/la tanela melen agütsütsü asoshi ak, an mesüra azü agütsüdi ta atemzüktsü. Iba tekülem dangji Tatemzük ta ajar. Iba ama külemba jagi shirangbaji aneper ta jembia inyaka aru. Shirnoksa iba tatemzüki odir parnok anogo asem anembonger. Yamaji tar nungger yimsüyimbongji anembonga retreta benschia aru.

Anogo mapang kwi anembongtsü ibajibo mapa jagi dang sayua aru. Kidang tanur tebur ka sora anogo trok (6) anembongtsü aser tetsür sora anogo pungu (5) anembongtsü aser apuani tsüngta anogo semer (30) anembongtsü ta benschia aru. Yamaji kar sü achitsüsa süra parnokbo küm tepiyong anembonga aru. Anembongba tamaitüsü kima kiküm mesüra kishi dak süngsem songlokasa ayu. Iba mapangjibo aiener shinga kidangi maniketer aser parnoka shinga aieni maor, kodang anembong abensa-a arudir idangji süngjongji intoktsü ta inyaka aru. Item anembong mapa ajak ya Tiar nem aküm tetushi aguja merükteta külemba ta züngshi.

4. Tsüngrem tapu balala

Akhi alemli asen Aori külemba tsüngrem ya aika liasü. Tenüng teta ajaba tsüngrem tatishitsü agi; Lijaba, Meyutsüngba, Longtitsüngba, ano aika lir. Iba den ano tenüng teta mejaka parnok süng tulu, lung tulu, tokong tenem, ayongtem ajak madak kibur ka lir ta amanga parnok külemba aru. Item tsüngrem rongnung kar tuluba kar tilaba ta masü saka tsüngrem shiaji pei pei shilem lir ta amang. Tatishitsü agi; Lijaba tsüngrem ta asünung, iba ya alima aser taküm aliba ajak yanglusang tsüngrem ta amang. Anungji, Tar nisungtemi Lijaba tsüngrem nungi temoatsü meshia kenü retreta pa tushia amung. Lijaba külemba amungba anogo ya tanga amung ama masü saka alar anisüngzükba anogo ta-a ajar. Kechiaser iba anogo nung ya mapa teinyaktsü kecha maka, süngben tzütai maotsü, tsük masentsü, shizüng tsüksa tokolak maloktsü, ali matenshidaktsütsü, nokbang majenoktsü, tetsüng agi ali arakzütsütsüsa tashi agi majemshitsü, ali atenshia süng masotsü ta munga aru. Ammang o sangwa tsüngta putiri yimdong nung porepjen meintok tashi yimdong nung shinga mesenzütsü. Yamaji Lijaba amungji akangakanga munga liasü.

Lijaba mung amungdang ken yamaisa aten;

Lijaba mung amungdangbo,

Süjin shira abener

Anishi den chiyunglaba.

Ano külen kodang

Ano külenbo Longtitsüngba mung amungdangbo ken yamai aten;

Oh amungdangbo,

Longtitsüngba amungdangbo

Sürem tajung abener,

Shi den chiyunga mungdi ni.

Longtitsüngba ya anüng tsüngrem ta parnok amanga külemba aru. Par yimsüyimbong yimya ajakji kasa masü saka khen khen pelatepa longsotepa shi den chiyungtepa külem aser mapang kabo süjen shira dang abener anüshi den dang chiyunga külemba aru. mapang kakabo parnok junga mekülemtetba agi yipru mopung tesashi arua kiojen aser alu raksatsür ta amanga aru.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Manila nung Asia Conference on Church & Mission tenzükogo



June 09, 2026 aonung Manila nung Asia Conference on Church & Mission (ACCM) 2026 tetenzük sentong nung tangokba noksa nung angur. Iba Conference nung linük 25 nungi tejaoker 210 shilem agia adener.

June 10, 2026: June 09, 2026 aonung GCF South Metro, Alabang, Metro Manila nung Asia Conference on Church & Mission 2026 tenzükogo; iba Conference nung linük 25 nungi tejaoker 210-i shilem agidar.

Asia Evangelical Alliance (AEA) aser Philippine Council of Evangelical Churches (PCEC) nati iba conference ayongzüka Greenhills Christian Fellowship South Metro nung iba sentong agir.

Anogo pezünü sentong nung küm tenet atema mangdang ayutsü, aser ibaji 2033 küm tashi nungbo Asia tesem ajaklen nütsüngsüba Arogotem yangertsü atema lir.

2024 küm August ita nung Asia Evangelical Alliance-i AEA 11buba General Assembly Ulaanbaatar, Mongolia nung ayongzüka agia liasü, "Nütsüng mesüra Süadokang" omen nung agiba sentong nungji Khristan lenirtemi Asia nung nütsüngsütsü atema jembia liasü.

Ano 2025 küm June ita nunga Asian Evangelical Leadership Forum-i South Korea nung "Nütsüng mesüra Süadokang 2.0" omen nung iba Conference ayongzüka agia liasü.

Tang Manila nung ayongzüka Conference omenji "Nütsüng mesüra Süadokang 3.0" lir. Joko o lemteptsü atema mapang ka masü saka mapa inyaksü mapang ka.

June 09 aonung tetenzük sentong atema omenji "O Kibuba, onok tanaben asentenshidakjang" (Habakkuk 3:2) liasü.

Tetenzük sentong nung jembidang Asia Evangelical Alliance Chair aser International Council of the World Evangelical Alliance Chair, Godfrey Yogarajah-i, "Nütsüng mesüra Süadokang" ta asüba omen ya ajanga nisung karbo jashidaksütsüa akok. Asia nung nütsüng billion 4 dak tema lir aser iba continent

shilem tuluba ka nung Yisu Khrista tenüng-a kodanga mangashidang. Ibaji rongsen maliba agi masü saka Arogoi tangatetba tiyongtsü nungi pilaba agi lir," ta metetdaksü.

"Arogoi nütsüngsüba anenogo. Tenla kidang menden sünga amener, asenoki kiojen yangluteper, sentong balala ayongzüka agir, saka asenoki Kibubai tenyaba wadang tuluba amadokogo," ta paisa metetdaksü.

Mathi 28:19 nung aliba Lai dak sendakba nung Yogarajah-i, "Iba oren nung tongtibangbaji 'aotsü' mesüra 'baptitsütsü' mesüra 'sayutsü' atema masü saka 'nütsüng küm daksütsü' lir. Ajak dak alia Pai asenok dang langka inyaksü shia lir, ajisüaka asenoki ibaji meinyakra 'Khristar Arogo' ta jembitsü asenok dak temeden mali," ta metetdaksü.

"Nütsüng mesüra Süadokang" omen dak sendakba nung Yogarajah-i, nütsüngsüba anenadokba Arogotemji timtem nung aliba Arogotem lir, ta ashi.

2033 küm tashi nung ataloktsü alizüing yua aliba dak sendakba nung Yogarajah-i, "Asia nung national evangelical alliances shilem 50-i nütsüngsüba alliances yanglutsü- kong member denomination shilem 40 dak temai iba mangdang atema inyaksü, local Arogotem shilem 30 dak temabo nütsüngsüba Arogotem asütsü aser Arogotem nung züngsem shilem 20-ibosa nütsüngsüba mapa inyaksü," ta metetdaksü.

Kasa sentong nung jembidang Asia Evangelical Alliance General Secretary aser CEO, Dr. Bambang Budijanto-i, 2016 küm Bandung, Indonesia nung AEA general assembly aliba mapang nung nütsüngsüba timtem indang jembia liasü aser iba mapang nungji Barna Group-i America nung aliba Arogotem nung Kibubai tenyaba wadang

tulutiba dak sendakba report ka metetdaksa liasü, ta ashi.

America nung Khristantem shilem 20-i dang nütsüngsüba mapa inyaker, ta Barna Group-i bushiteta liasü, ta pai metetdaksü.

Budijanto-i, "Khristan pongu shia nungi pezüibo Yisu Khristai tatem sabuba tenyaba wadang meinyaker. Ajisüaka tamajungtibaji ibai lir- leniremi iba ya meteta lir saka kecha masü ama toktsür. Asenoki ajak junga lir ama Easter amonger, Khristmas amonger aser tongtibang anogotem amonger," ta ashi.

Paisa, tamalen AEA-i Mongolia aser South Korea forum nung nütsüngsüba indang jembia aruogo, aser tang Manila nung ayongzüka yabo mapa inyaksü atema lir, ta ashi.

2033 küm tashi nungbo Evangelical Arogotem shilem 20bosa nütsüngsüba Arogotem asütsü aser item Arogotem nungji züngsem shilem 20-ibosa nütsüngsüba mapa inyaksü, ta paisa metetdaksü.

Budijanto-i, tang Asia nung aliba yimitem teimbaka nung Arogotemji hopta shia sentong ayongzüka agiba Arogotem lir, kong Arogotem Amongnü tekülem sentong atema rongsen shilem 70 tashi indoker, ta ashi.

Paisa, "Sentong agiba nungi nütsüngsüba Arogo ka akümtsü nungdaker. Ibaji teinyaksü mapa ka lir," ta metetdaksü.

Paisa, iba Conference tatem bangbuba anogo nung tejaokertem aser Filipino nung pastor tem 1,000-i nütsüngsüba atema jembitsü, ta metetdaksü.

Sentong tetenzüklen Philippine Council of Evangelical Churches (PCEC) National Director, Dr. Noel Pantoja-i lokti pelaa agizük.

Dr. Noel Pantoja-isa, "Asenoki Kibubar sentong aser Arogo nukjidong mataloktsüra asenoki alima nem teimla magütsütetsü," ta metetdaksü.

ANO GO ABEN TSÜNGREM DEN

Temolung süa liang

"... kechi tia nungsa lidir, iba nungji temolung chia alitsü ni angazükogo" (Fil. 4:11).

Takar akümba, nungtoko akümba aser jenjang tajung nung aliba jagi temolung chia alir ta meshitet. Masü ta kari bilemra, kechiba rongsen jenti akar, nungtokoi alima jangratem ajak inyakdang tatem nung pei sasa asür? Kechiba asayar nungtokotemi parnok tenüng tamajung bener arua jenjang raksatsüsa mima mozü amshir? Temolung achibaji item nungi masü saka tanga ka nungi arutsüla aser ibaji Khrista ajanga .

Paul-i temolung chia alitsü ni angazükogo ta ashi. Kechiba? Khristai nungdak ajak ataloktsür aser Pai tashi itdaksür. I Tim. 6:6 nung " temolung achiba den temeshibaji atangji tajanzük tulu lir ta shia angutsü".

Samaria chuba Ahabi Naboth-er tsükmenatsü lu agi. Dawid chubai Uriah kinüngtsü Bethsheba agi. Ibaji ajanga azü tokshiba, tejashi, atakatem aser Tsüngrem dang temenen mena. Temolung chia maliba taküm tepela mali, tenükshiba agi sünga lir, pelar ta meshiteter, nemnemer, aser taküm jangratemamalir. Anungji Tsüngremi kechi moatsü iba nungji temolung chia lidi. Tsüngremi kechi moatsü iba nungji temolung chia aliba takümjiang takar.

Mumbai nung Yisu Khrista indang kürakyanglu raksatsü



June 10, 2026: Mumbai nung Yisu Khrista kürakyanglu ka raksatsüba tatalokba nung aibelenertem nem temerenshi agüjang aser yimti nung tekülem kitem ajak kümzüka yuang, ta Khristantem takhangba agütsü.

June 7 nü Mumbai kübok Parel kiyong nung mejangjaba nisung kari Yisu Khrista kürakyanglu raksatsüba ajanga Khristantem kanga jashir.

Parel nung aliba Holy Cross Arogo nung putir, Francis Noronha-i, "Iba tatalokba ajanga Arogo nung züngsemtem kanga jashir, kechiyong Tenla kima lenmanglen aliba kürakyanglu matsüngdang tamangertem sarasadem," ta metetdaksü.

June 9, 2026 nü Bombay Archdiocese nung otongdar, Nigel Barrett-i sangdong ka ajanga, "Archdiocese of Bombay-i iba tatalokba atema tebilemtepsü akar aser Mumbai nung Khristantem atema temeshi tesemtem raksatsübaji sashia aitsür," ta metetdaksü.

"Iba ya mapa tamajung inyakba dang masü saka Khristantem anema inyakba aser akhidang nungi iba yimti nung tesünep nung aliba nüburttem anema inyakba lir," ta pai metetdaksü.

May 13-14 anogotem nunga Mumbai nung Aso 16buba mapang asüba St John the Baptist Arogo Tenla ki anaben raksaja liasü.

Bombay Archdiocese-isa item tatalokba ya jungjunga bushisüngdangtsüla aser aibelenertem nem temerenshi agütsütsüla, ta takhangba agütsü.

"Kürakyanglu raksatsüba ajanga Mumbai nung Khristantem amokmeren mesüdaksütsü. Onoki maneni sarasademtsü aser nüburttem tenzüksü," ta sangdong nung shia lir.

"Yimsü ka amangertem indang temeshi tesemtem raksatsübaji Mumbai amakba den kasa lir," ta Barret-i metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Yimnü

(n) asüng ser anogo tananübuba (2nd day after tomorrow)

* Yimnü asenok telok senden alitsü jatepa lir.

Yimo

(n) yimkongi lemtetba o, yimten yimsüsüri metetdaksüba o (Public statement)

* Yimo alema inyakerbo temerenshi angur.

OLONG PAITEP # 7531

1			2			3		4
5		6						
						7		
8								
								9
		10			11			
			12			13		
14								
					15			
16								

TIPLÉN

- 2. Auonung chiyongsü asenba
- 5. Mangyimba mapang
- 7. O tamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüng
- 3. Tenarong maten
- 4. A ___ g
- 6. Mopung apodoka
- ola adokdaksüba
- 9. Tongtipang tagitsü
- 10. Menungra bilem
- 11. Aiür
- 13. S ___ k
- 14. T ___ r

OLONG PAITEP # 7530 TELANGZÜBA

TIPLÉN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem, 15. Tambu,
- 16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok, 12. Amang,
- 14. Jala.

NAI-A YA METETTER



Michael Furrh, Debbie Reynolds, aser Terri Janak nungeri "largest golf ball pyramid ever assembled" indang Guinness World Record yangluogo. September 27, 2025 nü Benbrook, Texas, United States nung par aseme golf balls 19,019 amshia pyramid yangluteta liasü.

Meghalaya CM Conrad Sangma-i e-bus 55 sayatsüogo



Shillong, June 10, 2026

(Agencies): Meghalaya Chief Minister Conrad K. Sangma-i Mongulbarnü PM e-Bus Sewa kübok electric bus 55 sayatsüogo.

Iba ya Meghalaya nung sustainable, accessible aser modern public transportation asoshi mera tulu ka lir ta CM Conrad-i ashi.

Iba mapa ajanga Meghalaya nung green mobility infrastructure tashi itshitsü aser inclusive public transport services alitsü ta paisa ashi.

Tanü electric bus 55 tashi sayatsüba nung nine-metre buses 25 dena lir aser iba nung 27 passengers menteter. Ano seven-metre buses 30 nung nisung 22 menteter.

Item bus indang driving range 150 kilometres lir aser persons with disabilities asoshi wheelchair accessibility features dena lir ta CM Conrad-i ashi.

New Shillong nung Umsawli nung dedicated e-bus depot ka yangludat aser iba ajanga operation nung yariteptsü aser electric bus fleet anepalutsü.

Tripura nung temai adokba telungpurtemi ghonda 72 mokdangtsü

Agartala, June 10, 2026

(Agencies): Tripura nung temai adokba telungpurtemi June 12 nungi ghonda 72 tashi rail aser road blockade alitsü amokmerenogo.

Parnok ya tesüiba nung National Liberation Front of Tripura (NLFT) aser All Tripura Tiger Force (ATTF) züngsemtem lir aser Centre o state sorkartem den peace accord sign sütepba mapa akümstsü takhangba agüja iba osang metetdaksüogo.

"Ketdangpurtem dang aiben mepishia aruaka tenangzüktep nung aliba ama rehabilitation aser welfare measures indang telangzüba kecha mali" ta temai adokba telungpurtem lennir Prasenjit Debbarma-i ashi.

Centre aser state sorkartem den peace accord nung sign sütepba sülen September 2024 nung NLFT aser ATTF telungpur 1,200 shi ka temai adoka Chief Minister Manik Saha tsüngdang prangpong-injang agüja liasü.

Iba agreement nung Centre sorkari telungpurtem rehabilitation aser lisopurtem renloksü atema Rs 250 crore package agütsütsü sangdonga liasü.

"Iba yimjung tenangzüktep agir küm ana süir. Rs 250 crore package sangoktsü saka tang tashi mapa kecha mali" ta Debbarma-i ashi.

Union Home Minister Amit Shah-i tawa Tripura semdangdang ajuruteptsü asoshi

Chief Secretary J.K. Sinha dangi shidi ka zülu saka telangzüba kecha maliasü ta paisa ashi.

"Onoki Union Home Minister den senden ka amentsü mepishiba atema sorkari telangzüba kecha magütsü" ta Debbarma-isa metetdaksü.

Temai adokba telungpur 1,200 rongnungi 79 dang sorkari agizükogo aser tanüngba züngsemtem tia memetet ta Debbarma-isa shisem.

Iba peace accord mapa kümä meinyakba atema tejashi sayua June 12 nungi Khowai district kübok Khowai, Teliamura aser West Tripura district kübok Barmura nung ghonda 72 rail & road blockade alitsü ta paisa ashi.

**GOVERNMENT OF NAGALAND
DIRECTORATE OF SCHOOL EDUCATION
NAGALAND : KOHIMA**

No. ED/NIOS-SEC/2026

Kohima, the 10th June 2026

PUBLIC NOTICE

The National Institute of Open Schooling (NIOS), an Autonomous Institution under the Ministry of Education (MoE), Government of India provides educational opportunities through Open and Distance Learning to learners seeking to pursue and complete their education with a mission of "Education for All". NIOS gives special focus to Girls and Women, Rural Youth, Working Individuals, SC/ST, BPL categories, Sports persons, Differently Aabled Learners, and other Disadvantaged Groups.

The NIOS conducts Public Examinations at the Secondary (Class X) and Senior Secondary (Class XII) levels twice a year, in the month of April and October. Further, NIOS also conducts On Demand Examinations (ODEs) for Secondary and Senior Secondary courses in two blocks of the respective academic year i.e., from December to March and June to September.

As per the provisions governing admissions under Stream-2 of NIOS, the unsuccessful candidates of Secondary (Class X) and Senior Secondary (Class XII) examinations are eligible to appear in the ensuing Public Examination scheduled to be conducted in the month of Oct/Nov 2026 under Stream-2. Such learners may also avail the opportunity of appearing in the On Demand Examinations (ODEs) under Stream -3 (Class X) and Stream-4 (Class XII) scheduled to be conducted during the period from June to September -2026.

Detailed procedure for admission, prescribed fee structure, other relevant guidelines are made available at <https://sdmis.nios.ac.in>. Interested Students/Parents/Guardians are advised to make use of the opportunities for continuing their education by taking Admission for appropriate courses.

**(SHASHANK PRATAP SINGH) IAS
Principal Director.**

Military helicopter khazüka yokba langzúa US-i Iran amak

Dubai, Aami/June 10 (Agencies): Gulf nung American helicopter ka khazüka yokba nung telangzüba agüja Iranian mitkar aser surveillance sites nung makogo ta US-i ashir.

Strait of Hormuz anasa air defence systems, ground control stations aser radar sites nung amak, ta US mitkar Central Command (CENTCOM) ajanga ashi.

Iba nung telangzüba agüja Iran indang Islamic Revolutionary Guard Corps (IRGC)-ia region nung US bases 21 nung amak, Bahrain nung ka aser Jordan nung ka, aser Kuwait army-ia parnok dak amakba nokdanga ayur ta ashi.

Parnoki amakba ya Hombarnü Apache helicopter khazüka yokba atema tapet telangzüba lir ta US-i ashir, aser IRGC-ia parnok amakba ya kanga tesashi ta ashir.

Iran-i helicopter ya khazüka yok ta US Tir Donald Trump-i tai tonglokja liasü aser US-i langzüksü nüngdaker ta ashi. Iba helicopter nung mena alir nisung ana ya takum mesama aser American sea drone kati kumzük.

US ketdangsür temi ashiba agi, Iran-i drone ka amshia helicopter nung amak. Ajisüaka Iran nung drone yagi asaa amakba asü masüar mejangja, ta US ketdangsür kati ashi. Semi-official Mehr News Agency-i ashiba agi, tayimtsü khazüka yokba atema Iran-i tenüng agia mali.

Trump-i ashiba agi helicopter ya Strait of Hormuz nung patrolling senzúa liasü, koba US aser Israel nati February ita tatemlen Iran dak mezüng amakba sülen shibanga lir.

Bodhbarnü IRGC ajanga ashiba agi, US-i amakba mapang telecommunications tower ka aser water tanks ana

raksatsü aser parnok Gulf nung Qeshm asetkong aser Jask aser Sirik yimitem nung amak.

US ketdangsür temi tang tashi par bases nung amakba osang nung telangzüba magütsür aser teraksa alia maliar mejangja. Jordan indang mitkari-ia Iran nungi khaloktsüba missiles pongu khazüka yokogo ta ashir.

Bodhbarnep Bahrain nunga air raid alert ka agüja liasü aser Iran nungeri amakba nokdangtetogo, ta yangji aliba ketdangsür temi ashir.

US-i asendenshir amakba sülen Iran foreign minister-i US dang tekumdangtsü metetdaksüogo aser ozü linüki amakba mesüra timtem agütsüba nung melangzüi metoktsütsü ta ashi.

"Parnok tongpang nung tamakok ajuruaka, US-i ozü temulungtetba tendanger. Nenok kumzüka linüra ozü region nungi ainshiang," ta Iran Foreign Minister Abbas Araghchi-i X nung zülu.

Washington nung US House Speaker Mike Johnson-i ashiba agi, pa Trump den takdang nung lia US-i ano maneni Iran dak amaktsüla ta telemtetba agi.

Mongulbarnü Araghchi-i Iran linük anasa bendanger sepaitem lendong nung lir, kechiaser par nisungi aibelener, plain accidents mesüra tangar den raradang tetsüngta nung timtem ajurur, ta ashi.

"Lendong ajemtsü mechi, parnok (bendanger sepai) asoshi solution tajungtibaji ainshitsüba lir," ta Iran leniri X nung ashi.

Mongulbarnü American Apache helicopter khazüka yokba indang Trump-i ashitsü minute ishika lia, Washington den yimjung ken o jembir Iran nunger Mohammad Baqer Qalibaf-i social media nung tensa tamajungba akumtsü

ama shia liasü.

"Asenoki diplomacy oshi jembiner, saka asenoki tanga oshitem ang kanga agi tajungba jembir. Nenoki nangzükba raksaang, aser asenoki tajungtiba nung jembitetba oshi jembitsü. Nenoki tamentsü inoka aliba kor nung nenoki mener senzür," ta pai zülu liasü.

Iba ya ajanga US aser Iran tsüngta yimjung ken o jembishinüba nung koba tashi ka kongshitsüar memetet.

Saka Iranian foreign ministry odongtar Esmail Baqai-i Bodhbarnü osangbener den jembidang, "US-i iba yimjung inyakyim raksaja osang meputepi yoker, par taginüba aser jenjang melenshijen melenshir aser ajak dang tamajungtibaji, ceasefire nung maneni aibelener," ta ashi.

Iran-i tensa tanaben asadangtsü nüngdaker, kechiaser tesendaktep inyakyim nung yimjung aser tashi ita aliba nüngdaker, ta pai ashi.

Mongulbarnü Israel sepaitemi southern Lebanon amakba sülen US aser Iran tsüngta iba tensa tia ya ajurur.

Israel-i southern Lebanon amakba ajanga ano tayang kepzüka amak tenzüksü, ta Tehran-i tekumdangtsü shia lir.

April ita rara khen asoshi anenba sülen tang mezübuba hopta tatemlen Israel aser Iran kati ka dak maktepa aliba anenogo.

Trump-i yimjak nung linük anaprong dang khatapba anentsü ashi, aser parnok region nung rara tembangtsü asoshi Washington aser Tehran tsüngta tezüngzüktep yanglutsü jembishinüba benjatsür ta ashi.

Pai Mongulbarnü osangbener tem dang, anogo ana mesüra asem lir Strait of Hormuz lapoktsü akok ta shia lir.

Indonesia rights activist ka acid agi amakba atema military officer 4 tepuokdaki yok

Jakarta, Aami/June 10 (Agencies): Indonesia nung military okadak kati, activist ka acid agi amakba ken o nung officer pezü tepuokdaki yokogo. Army-i tashi tali amshiba anema iba activist yagi ola adoka arua liasü.

Officer asem rongnung ka küm asem atema tepuokdaki yok, ka küm ana ser tesadang aser tasembuba aser pezübuba ya küm ka ser tesadang atema tepuokdaki yokogo, ta obendangeri Bodhbarnü metetdaksü.

Office pezüprongla ya military indang Strategic Intelligence Agency (BAIS) zügsem liasü, aser parnok ajak ya jelia sentong yanglur Andrie Yunus amakba nung aibelena aliba ngutetogo.

Yunus ya Commission for Missing Persons and Victims of Violence indang deputy coordinator ka lir. Iba rights group dang ya KontraS ta-a ajar.

Aija aliba officer pezü ya April ita nungi obendang tenzükba sülen national aser international jenjang nung kanga bulua jembiba onük ka aküm. Indonesia nung military tashi kanga sashia akümba aser aser democracy atsüngzüka aoba nung tang sepaitemi iba jenjang agiba ya-a shilem ka lir ta mongintemi ashi.

Arishi küm 27 tain Yunus ya March 12 nü linük yimtiba nung motorbike ka nung mener oya aliba mapang amak. Tanga motorbike ka nung nisung ana mener arua pa dak acid shiloktsü, aser iba ajanga pa tenük ka apok aser pa tejak aser temang shilem 20 rongka liasü.

Ken o koba nung sepaitem aitsüogo iba atema nisung ka timtiba agi küm 12 tashi tepuokdaki yoker.

Obendanger Fredy Ferdian Isnartanto-i, Edi Sudarko, 45, Budi Hariyanto Widhi Cahyono, 43, Nandala Dwi Prasetia, 40, aser Sami Lakka, 41 nung ken o nung sendaka aliba ngutetogo.

Iba tatalokba sülen military tekolakba mapa nung anen, saka pa anenba kuli kecha nüburttem nem memetetdaksü.

Prosecutors temi okadak ashiba agi, aija aliba sepaitem ya Yunus inyakyim agi jashidakja liasü, saka parnok official tetuyuba nung inyakba masü ta shiogo.

United Nations-ia iba tatalokba ya aitsüogo aser High Commissioner for Human Rights Volker Turk-i iba inyakyim ya tasü maiter inyakyim ka ta ashiba den, Special Rapporteur Mary Lawlor-ia iba tatalokba ya kanga taoksatsüka ta ashi.

Yunus yagi tir Prabowo Subianto-i aniba sorkar aser Indonesia nung civilian inyakyim nung military shilem taliba kuma aoba anema ola adoka arudar, kong taoba küm mapa nung aliba military personnel tem nem sorkar mapa bendaktsütsü atema ozüng ka agizükba densema lir.

Yunus-i pa military okadak masü saka civilian okadak ka nung obendangtsü asüngdang, kechiyong linük nung activist tem amakertem ya züngteta kar dang merenshir. Pai pa temang majung aser okadak temang makar ta shia ken o angadanga kecha nunga shilem magi-i liasü.

Ukraine-i Mariupol port nung tesem balala amak

Kyiv, Aami/June 10 (Agencies): Ukraine nunger sepaitemi Russia-i atsünger aliba Mariupol port nung tongtibang facility tem makogo, ta Kyiv-i Bodhbarnü metetdaksü. Iba tesem amakba ajanga Ukraine amaktsü asoshi Russia tashi tajemba kümdaktsüogo, kechiyong iba tesem ya logistics hub tongtibang ka lir, ta ketdangsürtemi ashi.

Energy aser management infrastructure amakba sülen iba port nung power makai aküm, ta Ukraine indang drone forces-i ashiba den, Parnoki 1st Azov Corps aser SBU security service amshia iba tesem maka liasü ta shisem.

"Iba port ya tsükchirtemi military logistics aser ozüng

alema Ukraine indang jangotsü, nagmati aser merang Russia-i shibelener aotsü atema amshia liasü," ta kasa sangdong ajanga metetdaksüogo.

"Tzükchirtemi Mariupol ya logistics hub ka ama amshia aliba tashi kanga ajemtsüogo," ta ketdangsürtemi metetdaksü.

1st Azov Corps-i lemsatepba video ka nung rong, electrical station aser tanga kiojentem drone agi amakba sayuogo.

Ukraine-i tawa Russia military logistics tem mapashia maka aruba nung shilem ka ama tang iba port ya makogo. Iba inyakyim ajanga Moscow inyakyim nung tetsükdaksü adokdaksür, ta ken o asadangertemi ashi.



Manila, June 10 : Philippines nung Mindanao south tsütsü tzükumlen menoknok magnitude 7.8 anokba sülen General Santos City anasa lenmang ka raksar aliba noksa nung angur. Hombarnü iba menoknok ajanga Mindanao southern coast nung kongshia nisung 45 asü, 17 samar bushir aser nisung 487 yiru, ta National Disaster Risk Reduction and Management Council (NDRRMC) ajanga Bodhbarnü ashi.

Benfica nung Mourinho melentsü atema Silva-i mulunga agizükogo



Marco Silva

Aami/June 10, 2026 (Agencies): Jose Mourinho Real Madrid nung oa adenba sülen Marco Silva-i Benfica indang head coach mapa abentsü atema mulunga agizükogo.

Arishi küm 48 tain Silva ya küm pong tashi Fulham nung coach mapa inyakba sülen taoba hopta contract tembanga mapa nungi anener liasü.

Benfica-i ashiba agi, parnok

tangatetep ka dangi aruogo aser Silva-i 2027-28 season tatem tashi coach mapa abentsü atema tenangzüktepbka ka nung sign asitsü lir, koba 2028-29 season tashi atsülangtetsü.

Hull City, Watford aser Everton nung coach mapa inyakba sülen Fulham ya Silva asoshi English club pezübuba liasü.

Mourinho-i club toktsüba

indanga Benfica-i metetdaksüogo, aser ashiba agi, Real Madrid-i arishi küm 63 tain coach atema compensation pound million 13 agütsüsü.

"Coach-i [Mourinho] tang pa shimba mulunga agizükogo," ta Benfica-i ashi.

"Ibayongji Jose Mourinho Benfica indang professional football team manager ama tanabenbuba inyakba tatemba ka dangi aruogo," ta club-isa metetdaksü.

Mourinho-i Benfica indang coach mapa September ita agizük aser pa lenisüba nung par team Primeira Liga nung tasembuba jenjang nung tembanga liasü. Pa lenisüba nung team-i khen danga tamakok mongui asaya.

2010 nungi 2013 tashi Real Madrid coach mapa inyakba mapang Portugal nung coach yagi La Liga, Copa del Rey aser Spanish Super Cup koka liasü.

Babar aser Afridi na Pakistan Asian Games squad nung mali

Aami/June 10, 2026 (Agencies): 2026 Asian Games nung Pakistan tebur cricket team Sahibzada Farhan lenisüba nung asayatsü, koba Aichi-Nagoya, Japan nung September aser October ita tsüngda asayatsü.

Asayar shimertemi tendanga asayar 15 shimba nung lanur asayatem dang timba shima lir, kong tang mezüngbuba Pakistan team nungi asayatsüpurtema densema lir.

Farhan, shiba Pakistan team nungi T20 Internationals 46 nung asayar lir, pa lenisüba nung tang mezüngbuba national team white-ball cricket asayatsü. Iba asayamung atema Abdul Samad vice-captain asitsü shimogo.

Squad nung tang mezüngbuba Pakistan tenung nung T20I asayatsü pur

rongnung Akif Javed, Ali Raza, Maaz Sadaqat aser Saad Masood nung densema lir. Kasa mapang nung Usman Khan team indang primary wicketkeeper asitsü.

Asian Games 2026 atema Pakistan squad: Sahibzada Farhan (captain), Abdul Samad (vice-captain), Abrar Ahmed, Ahmed Daniyal, Akif Javed, Ali Raza, Arafat Minhas, Haider Ali, Hasan Nawaz, Maaz Sadaqat, Mohammad Salman Mirza, Saad Masood, Saim Ayub, Sufyan Moqim aser Usman Khan (wicketkeeper).

Farhan ya Pakistan T20 team nung teti shima arudar, saka pa lenisüba nung national team limited-overs format nung khen danga asaya mali. Kasa mapang nung Samad T20I pongu nung asayar lir, saka pa taoba küm March ita nungi iba format nung khen danga asaya

mali. Pa international jenjang nung tatemsa Australia den ODI asayamung ka nung asayaogo.

Asian Games squad ya taküm küm tetenzüklen T20 World Cup atema Pakistan-i shimba squad den mesükteper. Team nung asayar tejen; white-ball captain Salman Ali Agha, den Babar Azam, Shaheen Afridi aser Shadab Khan nung züngoksema mali.

Iba asayamung atema shimba asayatem ya timba tang National Cricket Academy nung training agidar. Asian Games squad nung asayar 14 NCA white-ball camp nunga shilem agitsü, koba Lahore nung June 15 nü tenzüksü.

Asian Games nung tebur cricket asayamung ya September 24 nü tenzüksü aser medal atema asaya ya October 3 nü asayatsü.



London nung Queen's Club Tennis Championship nung Serena Williams aser la partner Victoria Melichar na Erin Routliffe aser Martinez na den asayaba mapang tangokba noksa nung angur.

2buba Inter-School Chess Tournament ayonger

Dimapur, Aami/June 10 (TYO): 2buba Ngwalwa Circle, Peren, Inter-School Chess Tournament 2026 July 21 aser 22 nü Government High School, Heningkunglwa, Peren nung asayatsü ayongzükogo.

Iba asayamung ya Rapid format nung 9-round Swiss System nung asayatsü, koba time control minute 15 aser 5-second increment per move yimya nung asayatsü.

Inter-School Chess Association - Ngwalwa Circle (ISCA-NC) nung züngoksema aliba school ajak dang Team Manager densema asayar 15 tenung June 30 nü tashi nungbo benoktsü metetdaksüogo. Registration den külemi taah agütsüsü nungdaker.

School shia Annual Membership ataah sen 1000 asitsü aser asayar shia atema Entry Fee sen 30 agütsüsü.

Asayamung nung sempetem yamai alitsü:

Team Championship
- Champion Team: Running Trophy aser kuli kaket

Open Category
- 1buba nungi 10buba tashi: Trophy aser kuli kaket

Category balala sempet
Classes VIII-X (tetsür &

tebur)
- 1st Prize: Medal aser kuli kaket
- 2nd Prize: Medal aser kuli kaket
- 3rd Prize: Medal aser kuli kaket

Classes V-VII (tetsür & tebur)
- 1st Prize: Medal aser kuli kaket

- 2nd Prize: Medal aser kuli kaket
- 3rd Prize: Medal aser kuli kaket

Classes I-V (tetsür & tebur)

- 1st Prize: Medal aser kuli kaket
- 2nd Prize: Medal aser kuli kaket

- 3rd Prize: Medal aser kuli kaket

Iba asayamung nung shilem agitsü aliba school ajak dang atakzükja aliba mapang tsüngda züngoksemsü aser iba asayamung takok ngua asayatsü atema takok tashi nongita yaritsü mepeshia metetdaksüogo.

Osang tejangjaba agitsü atema item number: 84159 07057; 80140 82865; 70054 58265 ajanga tongteprateptsü Inter-School Chess Association - Ngwalwa Circle (ISCA-NC)-i metetdaksüogo.

Pandya Afghanistan den ODI masayatetsü



Hardik Pandya

Aami/June 10, 2026 (Agencies): Hardik Pandya quadricep tera yiruba sülen Afghanistan den ODI asem asayatsü aliba nung shilem magitetsü.

Pandya ya temang kanga junga liasü aser June 2 nü nungi tenzük BCCI Centre of Excellence nung kanga meranga training agia liasü.

Pa Shubman Gill-i aniba squad nung June 11 nü adentsü liasü, saka tang yiruba sülen Bengaluru nung ano hopta anabosa mungzüksüsa kümogo.

"Asayamung tenzüksü lia tetsükdaksü adokogo. Pa quadricep tera yiruba ajanga minprong tera lir. Pa yakta anepatoktsü, saka medical staff-i taruba anogo ishika takok

tashi tashi agüja masayatsü asoshi tetuyuba agütsüogo. Hardik maneni Bengaluru nung mungzüksü, aser taneptsü bushiba mapang CoE physio aser trainer tem den angatettepa inyaktsü," ta BCCI ketdangsür kati metetdaksü.

Arishi küm 32 tain asayar melentsü atema asayar shimertemi tanga asayar ka shimtsü meshimtsü mejangja. Pa küm ka dak tema iba format nung masayai lir ta asayatsü liasü. Iba indang team management nem metetdaksüogo.

ODI squad nung züngsem kar Bodhbarnü Mohali nung team nung adentsü aser IS Bindra Stadium nung training session ka agiba sülen Brehostibarnü Dharamsala-i aotsü.

BILEMDANGANG

"Ner tanur tsürapur shimtsü asoshi nü dak tashi lir."